

【詩】

校園雜詠二首（七絕）

其一 桃花心木

金光流轉漫薰風，羽翅飛旋舞湛空。鳥囀猶哀憐葉落，步輕只恐碎黃絨。

其二 彈箏

清風款款拂涼天，怨曲幽幽繞冷弦。自古心音少人解，待今皎月有情憐。

送別學長畢業（七律）

六月鳳凰開翠亭，今朝一別散如萍。卞和抱玉無人識，俞瑞撫琴憑孰聽。
贈曲未成情已亂，舉觴欲語淚紛零。勸君展翅自茲去，指爪留痕心永銘。

註：俞瑞為俞伯牙之名

【詞】

憶江南 雨後湖景

狂雨過，雲帳爍麟金。紅杏舞堤拋碎淚，白鵝浮翠理潮襟，媽笑漾湖心。

憶江南 閨思 次韻敦煌曲子詞〈望江南〉

寒霧薄，曲水畫紋銀。瘦月沐風鈎暗幕，殘枝蔓頂攬飛雲，燭下斷腸人。

踏莎行 新春有感

桃頰凝珠，柳絲纏水，一簾酥雨無聲墜。奈何舊燕不歸來，初甦紅杏空垂蕊。
冷酒浮雲，輕煙環佩，千愁飲盡猶難醉。誰言花綻暖陽回，春風還凍離人淚。

雪梅香 相思

霧迷夜，香浮小徑月溶溶。灑湖心銀碎，低吟緩步愁濃。一點殘螢拂花影，幾層紅葉隱人蹤。
鳳簫咽，遍繞飛梁，音散遙空。
重逢，執纖手，綺帶柔纏，笑語縈風。慢撚琵琶，別情盡訴絃中。冠羽驚啼醒幽夢，曲消寒木雜疏鐘。
天階冷，院落無聲，星顫芙蓉。

註：冠羽為畫眉鳥